

10 Jahre Hundeplauschgruppe Benken

**10 Jahr isch es här sit's diä Gruppe git,
mir müend doch sägä, äs isch wüekli en Hit!**

**Uf emä usdientä Fuessballplatz hät alles agfange,
zerscht hät mer emal müesse dä Güsel zämä sammle.**

**Klavier, alti Pneus und nu vieles, vieles meh,
hät mer uf dem Wiese-Platz chönne gseh.**

**Mer häts entsorgt und dänn gsichlet und gmäht,
vom Morge früeh bis am Abig spät.**

**Es mega guets Team sind dä Ueli und dä Gabi,
au wänn öppe en Wuffi isch en „Gstabi“!**

**Sie sind mit Leib und Seel bi dä Hündeler Gruppe,
au hät sich dä Wage in es pflägts Ambiente chönne entpuppe.**

**Im neue „ Outfit“, das därf mer schu sägä,
chunnt das jedem Halter und au jedem Hündli gläge.**

**STraining all Wuche ungezwunge und lässig,
trotz Ornig, gueter Führieg isch es nüd zstessig.**

**Frauchen und Herrchen sitzed gern gmüetlich zämä,
das gnüssed mir und tüends au sägä.**

**Verschiedeni Aläss, Grillabig und nu meh,
Feriäpass für Chind, ja das alls chasch gseh.**

**Öpis schwebt nu i dä Luft, äs isch es Träumli,
äs Hunde-Military organisiere zwüschet dä
Bänggner-Bäumli.**

**Dänn gits äs paar Episödeli diä eim eifach bliibet,
mir händ diä au gad uf es Blatt Papier ufgschriebet.**

**Am Gabi gahts im Training einisch ganz verschisse,
anstatt in Bissarm hät dä Hund i sin Arm bisse.**

**Äs wär doch öpis spannends, so nä Jugend-Hundestund,
doch dä Ueli hät verschlafe, da lauft doch öpis nüd rund!**

**Gli chunt wieder de Winter und ihr wüset was mer dänn chan
geseh,**

bim Üebigsplatz muess mer d'Autozieh usem neue Schnee.

**Mit dä Taschelampe suecht dä Lorenz öpis vo sim Hündli,
doch me schmöckt nur dä Übeltäter und nüd das Pfündli.**

**Wiit unde im Tobel kämpfet dä Nico und dä Charlie ganz ohni
Chleidli,**

dä Ueli stürzt dä Abhang abä und trännt diä beide weidli.

Am steile Hang vor dä Bogme, ja wer kanns?

Alli mached schlappi, nur nicht der Pfister Hans!

Was isch hinde oder vorne bim ene Wasser-Chrueg?

**Fraget doch dä Manfred, de weiss jetz wiä mer eine bediene
tuet!**

**Bim spielerische Parcour chrücht vorne äs Hündli dur äs
Tunnel,**

doch wer hindä usä chunt isch es Chindli ganz schnell.

Wie chamer au än Sitzbank mit emä Liegestuehl verwächsle?

**Es isch kei Maa gsi, sondern ä Hündelerin wo hät welle
gschpässle!**

**So, jetzt zum Schluss wämmer vor allem am Ueli danke sägä,
er tuet mit Lieb und Seel diä Gruppegmeinschaft pfläge.**

**Mir hoffet, es bliibt nu mängs Jahr eso,
dass mir därfet mit üsne Hünd in Kessel ds Bängge cho.**